

E CANDELA FERROZ DEN FIN DI SIMAN A DUNA E MUESTRA CU NO TIN CONTROL RIBA SEGURIDAD DEN NEGOSHINAN

ORANJESTAD(AAN): E candela feros cu e pone Visage, El Patio y Codemsa keda completamente destrui, a duna e muestra cu na Aruba no tin control riba seguridad den negoshinan.

Tur e negoshinan aki tabata contrui mucho serca di otro y e departamentonan di gobierno cu mester a controla esaki a faya barbaramente den nan trabao.

Den Visage tabata tin un cushina y na banda tambe

tabata tin un otro cushina di restaurant El Patio y ambos cushinan tabata tin boterman di gas cu ta forma un peligro grandi den caso di un candela.

Cada restaurant tin e derecho di existencia y riba esaki no tin critica, pero loke si mester worde bon analisa aworaki cu e candela feros cu a tuma lugar ta cu, mester trata di evita cu cushinan ta worde traha serca di otro establecimentonan.

Tin mas lugar na Aruba caminda tanto negoshinan como casnan a worde traha mucho serca di otro y den caso di un candela, e candela por pasa di un lugar pa otro y asina cuasa un desaster den un rato di ora.

Gobierno mester cuminsa existi di negoshinan cu nan mester instala un sistema di Sprinkler, caminda e sistema aki ta cuminsa spuit awa mesora den caso di un candela.

E pregunta cu mester worde respondi durante e di-

anan venidero ta cu, si e cushinan tabata tin sistemanan di Sprinkler cu por a limita e daño di candela?

DTI mester bin cu reglanan mas severo pa loke ta trata construccion di negoshinan serca di otro y tambe controla e negoshinan.

Reglanan ta masha bunita pero sin no tin control anto tanto bal, pasobra e situacion ta keda mescos, te ora cu algo pasa.

Gobierno mester laga haci un investigacion profundo pa asina casa afor si e negoshinan cu a pega candela, a tene nan mes na e reglanan di seguridad.

E mesun investigacion mester bay saca afor kende den e departamentonan di gobierno, tabata responsabel pa cu e control riba seguridad na e negoshinan aki.

Esnan responsabel mester bay duna cuenta dicon nan no a alerta e negoshinan en cuestion riba e aspectonan di seguridad y riba e peliger-

nan di candela.

Si bin sali afor cu ta e departamentonan di gobierno a faya barbaramente, anto medidanan mester worde tuma contra esnan responsabel.

Doñonan di diferente restaurant local na Aruba, a tuma contacto cu DIARIO, pa nan a expresa nan desgusto pa loke a pasa cu e establecimentonan cu a pega candela.

Nan ta lamenta cu e negoshinan aki mester a perde nan negoshi dje forma aki, pero di otro banda nan a basha critica pisa riba DTI y Brandweer.

DTI y Brandweer ta existi masha hopi di restaurantnan local pa loke ta trata seguridad, pero e departamentonan aki aparentemente ta midi cu dos midi.

Tin varios negoshi na Aruba cu no tin e instalacionnan pa proteccion

den caso di candela y e departamentonan di gobierno sa esaki masha bon, pero nan no ta actua contra e cierto establecimentonan aki.

No por ta asina cu di un banda negoshinan mester inverti miles di Florin den instalacionnan di seguridad pa nan negoshi y di otro banda otro negoshinan por haci loke nan kier, pasobra aparentemente mester tin konkelmento ta tuma lugar cu e control riba seguridad.

Tin comerciante cu tin miedo cu e companianan di seguro awor ta bolbe haya otro excusa pa aumenta tarifanan di seguro pa negoshinan, pasobra e candela grandi aki sigur ta bay cosa e companianan di seguro miyones di florin.

E candela feros cu a pone henter Aruba riba bao, lo bay lanta un discusion fuerte riba e tereno di seguridad di candela na Aruba.

Telefon di **DIARIO** 26747

E CURAZON TAMBE A KIMA!!!

